

晚

晴

移

詩

匯

晚晴移詩匯卷一百三十四目錄

麟桂 三首

葉志詵 一首

嚴烺 一首

文冲 三首

覺羅崇恩 六首

伍秉鏞 一首

成瑞 四首

高錫恩 四首

寶琳 一首

嚴廷珪 八首

黃文涵 二首

潘正衡 一首

陳裴之 十一首

陸機 五首

顧楨 五首

秦細武 一首

何日愈 三首

侯家璋 一首

楊炳 三首

王培荀 一首

黃喬松 二首

張斌 一首

黃若濟

二首

錢泰吉

十二首

敖興南

一首

陳圭

三首

李匡濟

一首

祖攀龍

一首

顧翊

九首

孟傳璿

一首

金鼎燮

一首

金鴻佺

一首

張延邴

三首

車酉

一首

謝齡

二首

王鵠

九首

吳爲楫

三首

沈鉉

一首

顧植

八首

晚晴簃詩匯卷一百三十四

徐世昌

麟桂字月舫滿洲旗人歷官光祿寺卿有退省堂詩集
夜渡揚子江

輕舟小如葉入夜渡江行急浪連雲捲遙天際水平
灘頭奔萬馬雨腳起長鯨欲認揚帆處回看已數程

舟中夜坐

日暮逾山分外青夜深滴露溼窗櫺船頭水面窺雙月
螢火漁燈誤遠星幾處寒蛩吟岸草一聲秋雁下沙汀
此時多少關心夢笑我無求好獨醒

辛亥重陽偕聯方伯中尙衣祥主政登雞鳴寺卽事
雞鳴高寺共登攀十萬人家俯視間江闊白翻三峽水窗

虛青受六朝山西風老樹經霜醉落照疏鐘送客閒貪看
秋光憐菊影月明連轡下塵寰

葉志詵字東卿漢陽人官兵部郎中有御覽集

詩話東卿嗜古博學考訂金石尤爲擅長嘗得周鼎
置金山僧寺中同時俊流皆賦詩以張之一時傳爲
佳話

道光甲辰夏五月得遂啟謀大鼎周宣王時物也置

之金山作歌紀事用王西樵焦山古鼎歌韻

我生嗜古勤搜索左右羅陳殊卓犖岐山有客攜鼎來神
物乍見緣耕作

王寅春二月陝西岐山縣城北榮湯村史姓耕地得之

其文百有卅

四字載紀元戎刊蠻洛命汝帥師遂啟謀嘉績用張達陞
閣經維四方實乃功獫狁博伐邊陲愕折首六百執五十
先行威震軍聲樂十有三年正月吉史減冊命賴貝博作

廟作器薦馨香乘飾服飾裏鷹鵠想像宣王中興年桓桓

撥亂如摧擣石鼓著辨徒滋疑自來言石鼓者迄無定論歐陽集古錄尚不免有三

疑之說今得此鼎相印證確知爲周宣王時物也銅盤取證足相酢先是戊戌歲

間溝岸中掘得饒季子白盤是十二年正月丁亥作與此鼎銘文極相類方今偃武際昇平寶

鼎一出光巖壑求珠何幸值因緣懷璧從來戒貪攫吉卜

合付名山藏浮玉嵯峨江流錯摩挲傳誦詡游人典守呵

護憑海若焦山之鼎閱四年銘文九月既望甲戌是宣王十六年戊子之九月十六日

伯仲相望慰落莫見聞詔茲希有珍注經校史羣攻錯西樵

元韻重四和韻姑仍之煙雲過眼如是觀萬古光芒燭高廓

嚴煥字小農仁和人官至東河河道總督

徐州重修放鶴亭落成

放鶴山亭亦偶然祇憑一記事流傳隱居樂可輕南面玉

局才原比謫仙勝跡鼎新經幾度胎禽羽化近千年重來
載酒成高會把盞先教酹古賢

文冲字一飛滿洲旗人廕生工部主事官至東河河道
總督有一飛詩鈔

過賈島墓

青山獨拜閬仙祠寒食春風雨似絲識得千秋詩骨瘦梨
花開盡墓門枝

登盤山絕頂

亂石雜雲堆松聲萬壑雷盤空如綫路絕頂幾人來紫塞
緣山盡滄溟接地迴蒼茫無限意獨上衛公臺

邯鄲道中懷古

霸國山河落照餘邯鄲城外又停車也知富貴終拋枕未

可窮愁始著書宮闕何年消甲盾風雲幾代廢耕鋤真嫌
酒薄難成醉那有閒情弔望諸

覺羅崇恩字仰之號語鈴晚號敵翁滿洲旗人官至山

東巡撫有香南居士集

詩話語鈴富收藏精鑒賞工書畫官山左最久嘗延何子貞太史主講席唱酬之作尤多

何太史索觀香南精舍宋揭聖教弟 本題長歌代

跋因次元韻答之

永和九年春禊罷臨河一序矜初寫

寫字上聲馬韻子貞誤押今姑叶讀作鴻

真跡鼠繭閤幽宮撫本歐虞各騰駕古德慈悲懼散逸妙

腕玲瓏運神化織珠爲衣了無縫融金鑄鏡光四射因之

聖教廣流布欲與蘭亭互陵跨謬說昔被子固惑院體會

爲通微詔抵鵲崑山未知寶獲維陳倉乃稱霸東洲居士

書學精慧眼能窺古賢罅虞褚尙難逃斥呵趙董那不擔
驚怕獨於仁師頗傾倒謂雖集書猶蘊藉傲齋翠墨茲甲
觀祕笈黃庭軼丙舍柴几今傳擬星鳳疊石何敢方嵩華
品題洵足永千秋鑒賞尤宜清九夏兩家書畫舫中珍奕
奕虹光生午夜

太史次前韻見答復小書便面以贈稱許過情感愧
交至疊韻奉報

斧柯未爛敲碁罷梧竹涼陰似水瀉問奇我自勤載酒追
暑君毋輕命駕吏散空庭領鶴行畫長高枕隨蝶化佳筵
傳來詩句新小字精能光彩射險韻蘇黃最善押盛名元
白亦飛跨論書得間豈刻苛鑒古識真戒虛詫獨有千古
俯餘子坐擁百城成一霸君藏寶墨紫瓊珍我弄珠泉青

玉罇拍手清歌鷗鷺馴橫空硬語蛟螭怕奇編插架恣涉
獵古搗堆牀日枕藉研金叩石參半解喝月呼雲退三舍
狂來酒渴吸長江興到書豪擘太華投分愧爲東道主隨
緣喜結西湖夏翱翔文海拜詩王麟篆降祥捫九夜

太史再和前韻三疊和之

奇兵屢出不容罷其勢有如建瓴瀉九霄鷹隼奮一擊干
里鶩貽煩十駕仙人嘯樹煖殊靈陳編食字蠹曾化各有
微尙寄鍛屐未可強同執御射聽經猛虎猶能馴斫陣生
駒詎難跨米顛潔癖不受汙子京印癡何足詫繆篆雖變
尙存古分隸兼陳近雜霸古人墨妙附驥尾小璽紅泥補
詩罇精斯入賞多取憎古乃足珍俗可怕閒尋幽事細商
推靜鎮狂瀾遙慰藉水退三篙苔上隄雲消數朵山當舍

袖中奇石富東海，篋裏殘碑影西華。翡翠啾啾響竹秋，蛸蟬寂寂過槐夏。向時奕壘審孤虛，池上開樽卜涼夜。

初夏郊居雜興

古寺雙橋外，清渠五柳前。開門賞疏豁，卜地得幽偏。墟里通漁市，人家隔水田。夕陽閒倚杖，林壑倍蒼然。野色開平楚，湖光納一亭。彩虹澄霽影，白鳥破空青。波漾層層繡，山圍疊疊屏。翛然真意遠，行藥過前汀。

淨業湖雨小，憩僧舍得句。有懷李四侍郎次雷字韻。黑日雲花湧作堆，芙蓉塘外殷輕雷。風從荇藻交時見，雨自菰蒲響處來。投樹禽喧山寺暝，荷蓑人去野花開。每逢佳景思君共，恨不僧寮話茗杯。

伍秉鏞字序之號東坪南海人貢生官湖南岳常澧道

有淵雲墨妙山房詩鈔

詩話伍紫垣崇羅輯刻同里師友遺詩號楚庭耆舊集前集始陳觀樓昌齊後集始吳石華蘭修各有九人東坪其諸父行與從兄霖川宗澤探賡後集自序謂用遺山中州集竹垞明詩綜例也

雨中送春

倚徧闌干酒一澆閒情都付與春潮
桃花落盡惟潭水柳絮黏時又板橋
回首蹉跎虛永晝懷人容易過良宵
何堪霧重煙昏候翦翦餘寒到綺寮

成瑞字輯軒滿洲旗人官陝西候補道有薜荔山莊集
度天山

天山一脈西荒肇萬里東來青未了伊吾之北月支南干
尋聳峙煙霞繞天功設險人力通鳥道羊腸深且杳初循
澗腹入峽口漸陟峯腰依木杪登巔陡覺眾山低穿雲俯

瞰雄關小厓懸坡滑石嶙峋欄迴路曲松環繞七十二盤
冰雪凝三百六旬晴霽少霏微空翠溼人衣料峭餘寒破
春曉我來一步一驚喜暫解征驂憩嶺表憑高迴首風景
殊懷古思鄉心悄悄

博克達山之麓有溪出焉迤邐北流越烏垣東鄙入
峽俗名水磨溝是也峽左有泉湧穿石隙會小泉
數十道下注大溪溪岸嘉樹龍蔥野花錯雜橋隄
樓榭位置天然不意荒陬得此佳境因賦詩以記
之

輪臺東北隅佳境暢游矚峽路杳且深溪流縹而曲盈陂
野卉香繞屋疏林綠禽聲和泉響琮琤似鳴玉當此秋氣
清身心澹無欲十年苦塵氛今朝幸免俗不費買山錢暫

息凌雲躡他日探春來鶯花絲再續

鐵關谷在喀喇沙爾哈爾阿滿臺南

遠嶂危峯翠作堆羊腸一徑闌林隈雲過壁石清奇現峽
束河流曲折來秋色天然成畫本灘聲到處走驚雷南行
漸出沙山口遙望連城萬井開

庫爾勒卽古連城地

策達雅爾早行

天際青山隱隱橫一溪流水碧無聲曉風殘月平沙路黃
葉堆中信馬行

高錫恩原名學瀟字古民仁和人貢生議敘道有友石

齋詩集

詩話古民性好詩入書肆輒捆載古今人詩集歸坐
一室丹黃點勘縱橫滿席詩典麗自喜多近梅村所
作積入千餘首

同人盧舍庵納涼作

纔看荷花纔郭開又尋禪室足徘徊樓前老樹擎雲入簾
外鳴蟬噪雨來殘暑墮湖看沸水斷霞擁塔欲成臺清談
未許徐陵至呼吸山光任舉杯

西湖打冰詞用梅村韻同賓梅作

北風凜冽寒侵骨凍合明湖冰半尺況復漫空吹柳絮干
山飛鳥藏無跡今朝雪霽同雲開喚舟漸有游人來銀橋
橫鎖不可進篙師奮勇呼若雷高擎巨艇露兩肘漸見層
冰缺湖口洶如金鐵相擊撞未識水仙震驚否免起鶻落
勢不平手揮白雨力匪輕豁然恍似城郭破但見利鏑如
椎成舟行順勢倍曲折船頭又阻重冰白急呼舟子更持
槳如巨嶽崩如帛裂岸邊冰堅類石橫千杵不動仍硜硜

嚴威冷洹有若此慨然念彼號寒聲遙看老梅正僵卧登
岸還尋酒家坐卻憶重光大雪年人著芒屨踏冰過

雋生招同曹葛氏也是園觀荷復至一粟庵小憩

瘴上少竹石亭榭亦罕遇芙渠更稀植美人徒遙慕小阮
招我游云有境堪赴喬家園最佳草徑同緩步入門果奧
曠紅欄半凝露飛橋跨長空旁折極幽趣芳池窈以清有
睡不敢吐灼灼紅衣明田田翠蓋護風來時偏反微香靜
中度如臨濯錦江疑入浣沙路映日色逾鮮出波顏獨嫵
吳姬比應羞越女看先如留連不忍歸臨去復回顧惜無
蕩槳舟泊向花間住

鐘魚出林杪一庵洵幽獨城市得山林身疑入澗谷門圍
枳棘籬樹老頭已禿殿古繞香煙梵唄聲相續水閣來清

風四面波影綠田疇如畫杵浪紋如織穀紅日不到處白
鳥時自浴坐久覺涼多蕉扇不須握物我可兩忘寂然心
自足何日借繩牀桑下來三宿

寶琳字夢蓮滿洲旗人廕生官保定知府署清河道有

知足知不足齋詩存

詩話夢蓮初知定州修水利治土豪捕盜賊興學校
韓志乘復祠廟民誦其澤既卒州人爲立祠張文襄
撰碑有云墨膠傳憤是謂真清葦枝懸庭不關細愛
牙軍課柳見土行之吏才壺士翳桑誦宣孟之實惠
梁公審直獨留泰伯之祠季友詞華重建張良之廟
最其上善俾鏤貞珉霜露星河歲時腰膺知朱邑之
魂魄猶戀桐鄉喜陸雲之圖形常依縣社

花馬池口外

馬嘶風壯出邊城千里川原一望平白日颺颺跳客路斜
陽駝馬走荒程遙岑影與雲天合極塞光分沙水明大地

渺如江海闊遠來車騎若帆輕

嚴廷珪字比玉桐鄉人貢生歷官順甯知府有小琅玕山館詩存

宿淨慈寺

蕭蕭湖上寺夜色滿禪堂客夢留初地鐘聲出上方石泉寒到枕山月近侵牀結習除難盡拈花問覺王

卽事

西風吹客鬢秋色動江隈一棹入深處黃花無數開壯懷誰說劍暇日好銜杯木葉蕭蕭下坐看鴻雁來

登金山

借得雙游屐山靈一笑迎虛亭涵塔影古殿走江聲仙去仍留墓泉清尙愛名潤州迴望處煙火鬱高城

游焦山

欲極蒼江勝扁舟指翠微
潮聲迎石怒風力挾帆飛
海近龍歸鉢山空鶴守扉
何當題壁去盤礴解征衣

鈴山

仙臺對縣門長橋跨溪水
策杖作山行儵然遠城市
登頓入薜蘿盤旋出礧礧
草木雜青黃沙土明赤紫
上有屋數間荆榛連廢址
當年分宜相通籍仍歸里
始願慕聖賢誦法實居此
一意典墳間九年冰雪裏
如何入閣後頓易平生履
履霜不早戒患由利熏始
太阿一倒持侵欲而崇侈
路人多側目奴輩競希旨
爪牙羅義兒淫荒縱愛子
政必以賄成忠必以諫死
孽海徒自深急流不知止
太陽忽迴光冰山奚足恃
徒令大奸名千秋入青史
讀書期明理理

明詎若是十罪有餘辜故鄉人不齒草廬望依然游人每
迴趾青松與白雲歎息蒙遺恥

黔陽卽古龍標城弔王少伯

龍標城外青山青龍標城下揚孤舫昔賢已去九百載
峩峩雉堞空彫零白雲影落覽不極江水直下機無停松篁
臨風互虧蔽荒城當畫常冥冥紅塵插腳此暫憩蹤跡髣
髴波浮萍唐家詩名盛開寶李杜並出場其靈其時少伯
才獨埒健筆利若新發硎驚人佳句歷今古奚止畫壁傳
旗亭詞科重入名益起雍容釋褐登明廷養魚射鴈亦戲
耳讒謗竟爾熒宸聽南交之謫非意料長途萬里愁馱鈴
琴書一肩老僕負自拾敗屨炊公廳此邦風土雖僻陋眾
醉亦足爭獨醒時有長跪乞詩者民之視公如日星公詩

在世久膾炙我今游此公已經芙蓉之樓屹然在公其來
止浮仙醪

信陽

夕陽延客上關樓路指中原第一州山勢縱橫分楚塞河
聲曲折接淮流里門誌石同千古萸菊登筵又九秋爲問
范園花竹裏當年風景得如不

寄題楊升庵先生寫韻樓

左順門前哭聲起詔獄爭收楊太史兩番敗杖血未乾扶
病恩恩行萬里萬里投荒供遠游點蒼山色橫吟眸禪房
小住二十日遂令名蹟成千秋海光舊額問誰署樓上徘徊
不忍去軼事曾聞續采鸞此是先生著書處六書轉註
留藝林一字價值雙南金樓與先生同不朽從今蠻語變

華音先生品羞璵萼伍先生學本程朱主德業何由臻日
新資性不足書堪補年年瘴海嗟飄零隻眼徒爲白也青
一編商榷亦偶爾斯樓終古流芳馨君不見梁王宮殿生
禾黍黔國亭臺游雀鼠勝地非逢著作才雕梁畫棟歸何
許又不見實錄親持史局懋贖刑讞論動經筵迴翔館閣
終無恙安得修名絕域傳嗚呼簪花傅粉皆游戲氣節猶
存大禮議木密誰爭投筆功桂湖空憶藏書地垂柳詩成
任自謳一聲橫笛不勝愁那知明社成墟久突兀天涯賸
此樓

黃文涵字子湘澧州人歷官廣西知府有憶琴書屋存
橐

詩話子湘好爲詩咸豐初元過洞庭取少年綺麗之
作股之湖以詩祭之其存者五卷手自鈔錄復以兵

焚散佚僅存二百餘
首所謂煙銷集者也

登牛首山

攜酒出南郊山行何屈折登高一以眺牛首更奇絕曠野
樹若薺山氣半明滅茅茨居絕頂高卧枕天關銀杏千百
年雷火僵復活白雲巢其巔望疑隔歲雪坐看霞西生天
風吹寂寂樵人下山歌牛背一聲笛我亦倦忘歸心與境
俱適一笑入城來舉頭遇明月

和金眉生廉訪江上寄懷

老不傷春春自殘棟花風起客心寒橫江波浪天邊接大
將旌旗壁上觀閱世更憐揮手易論交須惜賞音難英才
興替尋常事且向昭回變化看

潘正衡字仲平號釣石番禺人諸生候選鹽運司運同

有黎齋詩草

二月十二日

漠漠庭陰生綠苔年光如夢漫相猜
水楊柳暗江初漲山鷓鴣啼雨又來
鐙影半窗人病酒春心二月客登臺
棠梨花謝玫瑰放廿四番風故故催

陳裴之字孟楷號小雲又號朗玉錢塘人
諸生官雲南府南關通判有澄懷堂集

五臺山金蓮花詩

五臺山色本清涼種出金蓮滿上方
寶相千層圍法界瓊蕤四照散天香
風裳水珮游仙引月地雲階選佛場
爲問幾枝開並蒂瑤池長覆紫鴛鴦

一花一葉一因緣阿耨池邊種幾年
功德水涵眾香國華

鬢雲擁四禪天靈根漫佐伊蒲饌嘉樹應繙貝葉編舊是
文殊留影地折來還供法王前

鑄金辛苦布金難誰向仙家鬢上看鬢市栽來品優鉢迦
陵銜處味旃檀山經補系天花菜禪悅分參竺法蘭休比
南朝玉兒步捧珠龍女最珊珊

映日流輝豔綺霞山莊移自梵王家九天湛露凝仙掌一
路春風護屬車照影綠環靈沼水分香紅出苑牆花宸游
玩物非無意定有遺芳望翠華

秋日行田野間卽目寫之

塍南塍北秋草黃谿前谿後秋蟲涼野棠留豔絢春色叢
桂著花搖古香薜荔牆低間修竹時有書聲出茅屋枕流
三尺眠小橋照水閒鷗白於玉置身如在西湖間只愁繞

郭無青山高槐大柳老松樹繚繞屈曲成煙鬟長風吹涼
沁詩骨樹頂蒼茫一峯立爲問山從何處來天遣奇雲插
空碧

題朱西生綴遺硯樓詩集

林烏淒咽草蟲酸彈鋏侯門賤李端七子聲名重磨角五
湖煙水夢漁竿蓼莪朝隕門生涕蘿竹秋禁侍婢寒我比
聽歌桓子野茶煙燭淚幾回看

夏內史詩

漢紀表終軍魯史傳汪錡弱齡赴大義成敗非所知桓桓
夏節愍生遼陽九期磨盾誓猿鶴橫劍輕熊羆草檄厲士
氣破產充軍貲天心厭勝國遑許一木支昇階隕羅畢勝
兆遭幽羈日生首授命文麾同輿尸考功暨黃門先後沈

江濤銜冤嘯精衛披髮從湘纍四海無尺土九鼎懸一絲
西山有薇蕨不救志士飢天荒復地老慟哭將安之唐王
繼魯藩遙蔭忠臣兒拜爵殊羽林清望屬紫薇一官何足
重故國心不移表稱臣完消竊附勤王師騰蹕願有濟刀
鋸安敢辭表成謹封繕轉昇堯文齋邏卒獲以告刑訊陳
其私望門泣張儉複壁藏趙岐按籍識姓氏被逮經叢祠
九高幸相遭被服如沙彌暫時謝桎梏附書報雙慈慈親
寄空門漂泊愁無依生母託異姓救水將誰資門祚久衰
薄同氣無填簾賴有女兄弟端藉相扶持善保雙玉體無
煩念孤羈新婦現有娠未能辨雄雌生男自可喜生女慎
勿悲立後苟不肖何如不立爲滄身君所用消身父所遺
還以殉君父大節良不虧武功洵大器家事勞勾稽年年

寒食節清酒醑一卮俾免若敖痛此外無他思人生孰無
死每患不得時今旣得死所赴難焉敢遲桓山有弱羽飄
泊罹虞機不如屋上烏反哺母相違不如遶間鳩王國輝
羽儀但如子規鳥泣血中林呢一書寄內子義重非情癡
回憶結襦夕花燭聯旌旗三月邁大變外室成孤棲肯以
盛衰故交謫騰中閨賢孝嫺德曜和淑儕班姬霜飈厲貞
木比翼長分飛煢煢二九年坐見成孤接雙親歎白髮一
女纔孩提養育職綦重生是死則非所悲負郭田蕪沒成
蒿藜急難誰解慰離亂誰提攜勸生復何賴感此心魂淒
生平爲他人籌畫無所疑獨于夫人事生死兩不宜方寸
一以亂不認重致詞惟聽自裁斷反袂長歔歔從此卜歸
夢遠在天一涯鍾山何高高江水何瀾瀾孝陵宛在目雲

樹迷參差趨承絕劍珮清淚沾裳衣不圖垂死日反得瞻
皇畿待鞠故璫第囚首趨崇墀經略謂年少焉解揚戈殲
果能達順逆來者猶可追慄慄中書君壯氣凌虹霓但恨
賈志放遑惜前程迷回首語婦翁慎勿陳哀祈問卿職當
死畏憚將貽譏數語愧反側顏色增忸怩紀年逮丁亥尺
一頒彤闌九月十九日急景藏晨曦獄吏加銀鐐傳呼出
圓扉道聞鳴鉦聲壯士持交鉞同心數公旦蛩駘相追隨
碧血誓不化白刃甘如飴麻衣從故君植立森枯槁風雲
爲慘慄日月爲慙悽求仁而得仁含笑無淒其徒令旁觀
人淚下如縷縻良朋賴任沈雪涕收遺屍歸櫬先塋旁築
冢高崔巍冢邊何所植天矯青松枝惜無大手筆濡墨題
豐碑季世昧大義侈口相瑕疵動謂一青衿名器關甚微

見危卽授命于國曾何裨豈知毓至性全受求全歸髫齡
具卓識論古昭端倪逋逃侶諸葛重惜彈琴嵇出處商盡
善要在明倫彝膽氣凌順平眉宇秀紫芝白虹繼前烈黃
鵠悲慈幃世父負奇氣遘亂潛披緇城東結茅菴其名曰
竹籬終殉聖賢域曠代高風希女兄炳幽貞苦志追磨笄
楚嬰泣湘芷魯女悲園葵忠孝我家事此語良不欺三年
顏氏烏半夜劉琨雞宇宙浩然氣久已銘心脾此豈疆死
流所得矜瑰奇堂堂錢尙書東林揚芳徽垂老甘毀節不
畏千秋嗤浮名爾何物坐令天性漓當時辱贈言自負冰
鑒姿違意論定後史冊慚鬚眉士生各有志爵祿何尊卑
芳軌嗣袁勛演潔其庶幾終輸內史集彪炳千珠璣大哀
自有賦南冠自有詩劉蕡發悲憤正則懷履綦惟悲幸存

錄續著無留貽更有代乳集蠟鳳殊兒嬉篇帙付蟬蠹冥
漠騰光輝侍宦經雲間刺促驂歸駢崇塋遲修謁式轂心
神馳平生慕忠孝辨香迺在茲掩卷發三歎願世長雍熙
寺門小憩呈松壺子瀟兩丈

此是松壺畫全無筆墨痕秋林團雪蓋隕壁削雲根日落
猿嘯樹僧歸鶴守門最宜孫太白花底酒盈尊

海陵四至堂坐月寄懷賓谷節使師揚州

四并堂中別公去四至堂中傍公住也知公未到斯堂光
輝照徧淮南樹淮南遺澤海陵長紹聖名齊有美堂康樂
達人縣祖德士安惠政滿江鄉繡衣借寇從來有六州霖
雨爭驤首夾道焚香送使車問公還憶棠陰否宣慰欣傳
簡鄭韓簪纓休作尙衣看堂簾一德承恩易節鉞重來異

數難聖心獨眷江南重鹽梅好作和羹用早識元齡公輔
才待償昭達台垣夢蜀岡公讌狎煙霞別館題襟護碧紗
翠飲玉鑪三澗雪紅簪金帶四圍花致親許我聽官鼓絳
隨才愧兼文武八表閒停南浦雲一鞭催踏東華土甕社
珠光照海東屋梁顏色正思公江山夜共冰輪影絲竹秋
生絳帳風蕙櫟彷彿看題字恩恩廿七年前事當時童子
問何知此日勉爲清白吏月闕微名闕澤慚祝公開府又
東南魏公畫錦堂成後六至還應續美談

與徐星伯年丈

松

論江河二源賦此紀之

河出崑崙虛并渠千七百崑崙在何所譯言阿木七其下
星宿海沮洳鍾巨澤三伏復三見經歷古西域伏遇沙塞
黃見遇土壤黑神禹所疏鑿荒度始積石漢使尋張騫元

使命都實雖經絕塞行所見殊未的國朝幅幘廣已擴地

球脊茫茫葉爾羌遠與河源值迢迢阿克蘇亦近河源側

我觀河源圖惜未河源涉聊作河源詩當著河源說右河源

江源亦有三遠者來崑崙山南與山北與河同發源是名

金沙江兩界包乾坤萬丈溫都雪消以朝陽墩亦有鴉礮

江青海接玉門源與星宿同滿地銀濤翻岷山地最近門

闌通松潘羊膊與鐵豹咫尺籬與藩遠幹近爲支勢若卑

承尊衛藏地可括井絡天可捫李冰鑿離堆石犀今猶存

鼉靈閣三峽更驗江水痕一卷入蜀記翦燭從君論右江源

李翁峽江鑿難歌

灩澦大如象瞿塘不可上灩澦大如馬瞿塘不可下峽中

三百六十灘豈無險過瞿塘者漢陽李翁業操舟來往峽

江江上游某灘湍急某灘險篙師斂手長年愁石骨粼粼
水中起巨者如峯小如砥石勢所激灘勢成險處在山不
在水山勢一曲江一灣峽江治水須治山山險可開石可
鑿禹力未到翁心殫先鑿黑石次烏石得寸則寸尺則尺
萬夫錐鑿響不停坐遣巉巖化衽席紅石近在彝陵城山
勢所觸驚濤生鑿石須趁江水落投書欲與江神盟君不
見太華巨靈擘二山夸娥移異人異事古來有昔者所聞
今見之又不可見五丁開蜀道李冰鑿離堆翁心實心力全
力何慮萬疊青崔巍開山用煤兼用炭石痕裂若春冰泮
我意蘆灰用更神能使南山白石爛麻石畏蘆以蘆
焚之則立毀更有
青灘與葉灘與翁努力共隨刊峽江化作平江路無復人
間蜀道難

陸幾字次山仁和人諸生官漢州知州有陸次山集

詩話次山工畫戴文節稱其樹法之妙不減元人詩有佳句如富春舟中云風劃平林煙一抹夕陽紅處起漁歌又云捲起簾簾香霧重

青山不歸畫眉嬌皆有畫意

夏日訪雲栖菴繞過聖水洞遇雨

巴州四龕勝尤數西與南幽境次第入先訪雲栖菴稻花
一路香田水拖青藍橦子滿村大綠蔭垂沙潭山色迎人
來空翠浮煙嵐

茅菴卧白雲一徑入林麓引泉小成池鑿巖深作屋溪水
澹人心山花豔游目停驂憩午陰徘徊撫古木披雲坐苔
石山影一襟綠待訪安期生韜精棲巖谷

深林黯殘雨新霽遠岫沈雲飛萬峯活天暈半日陰野性
颯然舉尋山不辭深古藤壓徑黑但聞呼晴禽風定細簾

發急澗流清音

蜀中雜詠

邊城草木萬軍屯怪石嶙峋虎豹蹲天險盤空橫棧閣靈
關奪隘鎮夔門野花碧染萋宏血春樹紅招望帝魂看盡
奇山輸入峽雄心頓歇笑桓溫

悵望虞淵日易嚙美人名士盡荒墳故宮雨冷殘秋黍斷
鏃沙埋古壘雲好客尙思嚴僕射倖功誰弔鄧將軍金魚
濯水人何處鸛鵲浮波自結羣

顧楨字貞木號子幹無錫人諸生官掖縣知縣有聽泉

山房詩鈔

詩話子幹初除韓莊閭官任九年好行其德累
權禹城鄒城恩縣有能名詩才情俊五律尤工

雨中憩山家

一路屐齒痕煙氣昏茅屋隱隱水邊村離離露林麓微聞
犬吠聲幽花滿空谷

秋晚訪丁洽泉不值

病過重陽節出門來訪君但逢籬外菊獨對遠山雲之子
幾時返城南又夕曛何當同把臂樽酒共論文

蓉湖夕泛

湖光覽不盡湖水汎空綠蒼蒼生暮煙蕭條幾家屋明月
照前嶺斜陽暝羣木人歸古渡頭三五自相續漁火隱深
叢明滅出修竹言念避世人悠然樂高躅何當棹舟去襍
被蘆中宿

秋日登潞河城樓

秋雁又南去旅人還北征空山摧木葉落日滿江城塵事

紛如積華年暗自驚壯心殊耿耿徒作不平鳴

晚泊高郵寄丁洽泉

三十六湖水朝昏浸客愁春雲迷鐵甕落日下瓜洲漁火如星小潮聲入夜流江南同此月憐我泊孤舟

秦細武字省吾金匱人官彭澤知縣有城西草堂詩集

舟夜

寂寞荒郊夜孤篷幾度過江空驚月早山遠覺雲多暮色荒如許秋光淡若何忘機隨處得前浦發漁歌

何曰愈字德持號雲咳香山人官岳池知縣有餘甘軒

詩鈔

詩話雲咳負才慷慨長於論兵宦蜀四十年潦倒不遇嘗馳七八千里入烏斯藏故唐時吐蕃牙帳地留三載乃還王柏心敘其詩謂五古樂府追蹤兩漢而入其堂奧七古歌行如風檣陣馬迅利無前至涉邊

障蠻落者
尤爲雄傑

晚過慧師

慧公棲隱處結屋白雲巔門冷無過客山空聞暮蟬烹茶
掃落葉接竹引流泉乘月來相訪衝殘半嶺煙

夏日題署齋壁

墊角烏巾紫葛衫不妨狂客署頭銜十年射鴨稱中隱五
畝蹲鴟飽老饒興到援琴彈古調時還拄笏上層巖東園
種得半畦菊野莧蕪萊手自芟

古樹道中登山絕頂望西南諸峯

嶢嶢摩蒼天萬壑瀉激瀨古木猿猱號陰崖鬼神會四顧
何茫茫始訝坤輿大羣山皆俯伏迤邐如積塊側聽河漢
流俯視飛鳥背舉手捫日車乃知天在外常恐地維薄兼

愁星辰礙更喜西南峯巘崿逞奇怪森然芒角出羅列
悉下拜雲海盪心胸天風吹衣帶覽茲銷煩憂下山日正亥
侯家璋字雲嶺公安人官鉅野知縣有守默齋詩集

柳浪袁中郎先生別墅

春犁耕盡館基高柳浪如今剩白濤陶令歸時原有菊
劉郎去後已無桃天空牧笛湖三面月上漁船水半篙故
里人來蕭索甚碑文剝落首重搔

楊炳字子萱江西新城人諸生官永嘉知縣有惜味齋
存彙

侍玉方舅氏夜坐賦呈

月亦知人意窺窗分外明蝦鬚排竹桁蟹眼沸茶鐺
燈火秋心覺星河夜氣清此時參靜悟客慧不容生

渡江

片帆雙槳穩中流，乞得天風送客舟。
昨夜江南今夜北，玉簫聲裏上揚州。

喜晤肥鄉查梅史明府

揆

夙晤方三拜，騷壇契盛名。
墨痕分竹勁，詩味耐茶清。
嗟我倦行役，中途求友生。
萍蹤猝相遇，不負此郵程。

王培荀字雪嶠，淄川人。官四川知縣，與王者政合。刻蜀道聯轡集。

驪山歌

驪山火，諸侯不至，謂詎我美人一笑鎬京墮。
驪山水，冰肌賜浴，溫泉裏美人一笑鼓輦起。
美人美人，真傾城驪山何辜，代受名君不見穆王鸞輅登崑崙。
西宴王母探河源，八

駿未返徐稱尊又不見秦皇之罘駐旌旆志欲求仙觀海
外六龍初駕爲民害驪山一拳近郊甸未約仙人開荒宴
鐵騎胡爲來酣戰噫吁嘻烽火有如崑山燔玉石俱焚天
地昏禍水有如海水闊一滴浸成無底壑山不在大慾不
在多請君聽我驪山歌

黃喬松字鑑仙號蒼厓番禺人貢生官雲南鹽課提舉
有鯨碧樓嶽雲堂詩鈔

游黃仙洞坐磐石上觀瀑布

飛出懸崖端走入深樹罅飛崖走樹兩無定旋看天外神
龍挂我初遇之歎奇絕眼前有景寫不出霜痕陡割殷紅
缺煙光橫界空青截奔騰趨下成激湍激湍撞石石欲裂
非徒繪影兼繪聲頓令石破天亦驚風風雨雨時離合敞

礪松篁遠周匝隔斷松篁只有雲神龍出沒誰能分神仙
本是吾家事紺宇瑤宮一天地空山蔥鬱雲常住定有仙
人相笑語何不騎龍且歸去

穿雲徑

人行雲亦行人住雲未住杳然不見人但見雲來去盤旋
入層雲人聲落空翠

張斌字用和號雲閣江蘇華亭人候選布政司理問有
聽鶯館詩鈔

秋夜吟

幾點殘星逗遙碧微風拂衣寒不隔蕭疏一片蓼花明雨
洗天空涼月白寂寞悲闌漏欲沈蕭蕭絡緯報秋深滿階
黃雪因風掃風過餘香何處尋

黃若濟字子未號蘭舟嘉善人議敘布政司經歷有百

藥山房集

弋陽道中

昨宵信州郭知隔幾重灘遠塔明初日高城截半山米翻
雲碓白石繡土花殷茅屋誰家子臨風度曲聞

謁譙國夫人廟

轉眼梁隋祚屢遷石龍一郡故安然步擔竟敗李遷仕平
賊能資陳霸先犀杖賜歸聲淚迸金箱傳訓子孫賢山兜
廟邈高涼主巾幗何人敢並肩

錢泰吉字警石嘉興人貢生官海甯訓導有甘泉鄉人

橐

詩話警石博學敦行與從兄衍石給諫齊名稱二石
嘗手校史集編考諸家文本詳明青溪史記卷之三

讀他書皆類是於先代文獻勤搜寶守橐中有與衍石述家世文字書二十七通論者謂爲有數文字詩溫厚真樸與衍石亦如驂之靳每及師友弟昆纏綿悱惻故是香樹藤石家法

雪

日日望雪雪不得地底潛溫化蝗蟻時將臘盡乃作寒飛
花片片墮我側積不成寸俄晴融司寒無乃失其職君不
見京華十月天霜凝白野冰填川一日二日雪載塗行人
堅冰凍在鬚蟄蟲坏戶不敢出夜深冰面跳老狐京華厭
雪雪不止江南望雪雪更無爲問滕六彼何人使我天公
澤不均今朝微雪亦可珍幾日縣官出迎春作詩告天公
盍早霑足用使來歲大熟無飢民

趙中令琴歌胡仁圃

祥麟屬

空齋晝靜焚旃檀古琴挂壁生清寒漆文雖作蛇腹斷醞

釀開國元氣神猶完鳳池之中有遺字乾德元年趙普製
重修者誰張順修漢雲山人名同留吾聞太宗欲法文武
增二絃惜哉蔡裔所製今不傳是時雅樂尙未定此琴那
獨中和全何人試按和峴律使與叉手之笛同清圓枯桐
或是秦隴木屋材之餘琴材便飾微不用瓜子金十瓶或
未來海壖想當熾炭燒肉後應和靡玉聲纏綿靡玉宋太祖琴名
不然拋琴風雪夜終讀論語二十篇嗚呼陳橋排闥功莫
京國家之事由書生誓書尾署臣普記陛下不誤誰所成
彈之莫作履霜操九原骨朽心難平君不聞中有癡兒臨
死嗚咽悲嘯聲

得岱峯臨安學舍書卻寄

廣文書到苦言貧飢餓看山蒜髮新食少花豬兒女瘦規

依白鹿學徒親經師自古歸儒者大雅須教有替人莫倚
官閒無一事但吟蝴蝶句通神

聞岱峯將至以詩迎之用東坡喜劉景文至韻

十年晨夕相招呼五年相望天一隅離情欲寫不可寫往
往匝月一字無君詩數寄未屬和聞敵而退慚非夫不虞
君將涉我地旗幟欲豎無人扶急修壁壘待強敵挑戰豈
敢將虎鬚去年病中君訪我觀潮後時自笑迂

昨歲八月十九日岱

峯來問余疾不及觀潮有句云平生自笑多遲鈍不獨觀潮已後時吾儕謀事百未遂敢云

磨蝎如韓蘇惟餘狂態老不改嫖母自詫傾城姝當時同
好各星散握手猶得君與吾與君準備十日飲我夢已落

鴛鴦湖

時岱峯在禾

聞衍石兄歸郡城下楊學山兄樂壽堂賦呈四首末

篇兼懷雲壽兄武義

積雪明南窗獨坐憶遠道大河凍行舟何處賦春草忽傳
一紙書開緘豁懷抱爲言卸裝初樂事田園好上堂拜世
母慈顏幸未老家事咨長兄連牀度昏曉竭來犀角兒去
日猶襁褓咿唔共鐙火兄孫已聰了流光十五年忽忽同
過鳥暫辭京洛塵且食江鄉稻

江鄉迫歲儉物價日騰踊義田分無多況未薙荒茸幾家
典寒衣糴米入斗甬一飽未終朝飢腸已雷動卽今眼中
人何術救決踵歸裝萬卷書美味逾嘉種心計刪研桑遺
經述鄭孔樂道人忘貧蕭然掃塵塢里黨歡相依出門無
倥傯願買田一雙耦耕傍先隴

耦耕恐難遂夢想澈上山山中有丙舍靜讀可閉關高峯

九十九三面開煙鬟踏浪看山色我願充魚蠻卻因俗緣
重尙阻仙梯攀我兄亦多累何日全家還偶來鷗共泛難
與雲同閒不如且就我信宿茅三間相違動一紀鬢髮各
已斑百里猶恨隔即用衍石舊句未得承歡顏

歡顏定可承相約十日後冷齋得春融清氣滿戶牖高談

任縱橫參語可誰某家督秋水翁學山兄近自號秋水厚德壓曹偶

同眠布被溫共聽寒潮吼可惜武城師講堂隔川阜待寫

荆合圖同居期白首前年與學山兄同畫小影擬約雲壽

西偏荆合齋之義名荆合圖家風五百年宗族世敦厚夙夜念所生敬

詘誓不苟安排苜蓿盤徧酌屠蘇酒

衍石兄自大梁書院用東坡間子由瘦韻見寄次答

十年安坐髀生肉未至舉家常食粥講堂夜飲散學徒靜

看檐楹掠蝙蝠性情但覺漸疏慵嗜好焉能別流俗吾兄
手書時一開寶之不異徑尺玉遙天相望隔銀河古寺何
年訪金粟會須海上聚沙鷗共住山中友麋鹿元方將軍
季持杖那用紅塵走騶僕兒曹謹厚賴家風待效伯高嗤
刻鵠

盤谷硯歌寄酬衍石兄

少讀昌黎集夢想盤之中大行山字老未識何緣腳蹋幽
人宮吾兄知我饒硯癖爲致盤中一片石面含淺紫背深
碧泉甘土肥養玉液況有隴西隱君此焉宅盧老韓公共
游屐斯文元氣久蘊積能使鳳咮龍尾皆辟易我今對此
硯卻憶貞元初吐蕃大入寇烽火傳邊隅西川節度屢破
敵庶幾不愧大丈夫鬼夷此日負海嶠天子宵旰勞遠謨

樓船將軍盛兵衛輕裘坐展籌海圖書生不能草羽書枉
持一硯頻欵歔硯兮硯兮吾語汝但願龍起大澤驅天吳
一朝滅此釜底魚硯刻魚龍之象遠行不勞吉日出少陵採山釣
水容吾徒平沙綠浪榜方口用昌黎和盧郎中送盤谷子詩句與兄窮探
極覽相嬉娛

六舟屬題湯雨生將軍所贈畫梅卽次將軍自題韻
眾生苦顛倒孰肯解其縛將軍拯物心欲使出溝壑老梅
得成柯寒不受雪虐自序云琴隱園盆梅得地成柯回那
知琴隱園悲風頓衰索城郭人民非翔舞歸來鶴幽香伴
忠魂苦惱乃極樂平生金石契高僧共詠謔遺墨佛護持
九霄氣磅礴

題吳仲圭竹譜卷

吁嗟乎故園平安語不聞有竹已等申池焚秋聲可聽在

何所異鄉看畫得墨君

我亦有亭深竹裏也思歸去聽秋聲仲圭錄趙文敏句

墨君

落落掃俗態以趣爲上入三昧湖州之書亦抗行息齋之

譜或相配籤題藏弄瓠尊翁

瓠尊翁少宗伯公收藏題籤用瓠尊小印公中年自號也

翁畫竹與梅蘭同元章萬玉圖未見

亦瓠翁所藏

此卷意外今

相逢故鄉何日朋簪盍樂郊歌詠相酬答平生未訪梅花

村今宵夢繞梅花塔塔中道人眞絕倫橡林畫隱終其身

那能天地干戈際不作東西南北人

敖興南字蓼汀印江人貢生官貴筑訓導有蓼汀詩集

詩話蓼汀與蕭玉初齊名號思南二俊詩清麗如炊煙繞樹白連屋修竹壓檐青一窗楊柳晚煙人去後

梅花孤館月明時皆晚唐佳句

游雲山寺

不知山寺路取道覓荆榛幽青鳥呼伴空山雲逐人亂流
飛澗脊秋葉下巖脣卽此眞蓬島何須更出塵

陳圭字蘭莊攸縣人諸生官零陵訓導有秋水山房詩

鈔

半截松爲李錦巖居士

幹作

寫松須縱筆撐突見高節茲誰老禿爲精色入硯鐵豈伊
風輪過忽施鬼斧截虬髯半盤雲鶴蓋全偃雪鳳最元氣
縮礪柯蒼煙結碩體百尺圍厚地一丈裂猿猱枝上攫
虎根下抉女蘿不敢附仙脂自可啜獨存正直操老互風
霜閱雷雨時砰訇鞭電歛閃掣孤危世所忌擁腫匠乃劣
和嶠善養晦陶潛詎藏拙翛然三徑中腰脊肯一折不露
顛末材斯眞棟樑傑畫手蓄此意偶向尺縑洩靜者乃得

之迎晞歎奇絕

登拱極樓

騰身飛鳥上天影四圍看人語響空碧江心生暮寒雲開
三楚地風掃五溪蠻歲晏應聞捷斜陽同倚欄

官坡訪劉居士

魁南

天風吹我上崔嵬花擁肩輿一徑開仙嶺白雲晴似絮官
陂春水綠於苔高人恰聽鶯聲去好客纔從鳥道來吟倚
夕陽親剝啄古香飛出亂書堆

李匡濟字霄懷號小淮河南唐縣人優貢官魯山訓導
有充雅小草

伊闕

石磴盤雲上雙峯夾水開危巖虧日月飛瀑響風雷洞古

難尋路碑殘半沒苔香山知不遠幾杵午鐘來

祖攀龍字癭仙巢縣人貢生官建平訓導有醉春軒詩集

寄子愚

秋來離思滿天涯惜別嚴城感歲華王粲登樓猶有賦杜陵作客竟無家驚飈易斷雲中雁落日愁聽塞上笳若問故人舊顏色霜餘憔悴似黃花

顧翊字駿孫號南厓無錫人貢生官昭文訓導有金粟菴集

詩話南厓以諸生邀游公卿間杜石樵視學浙江陳芝楣開府吳會禮遇尤至咸豐庚申粵匪陷江南南厓憂憤流離逾年而歿其自編金粟菴集燬於兵火里人金一鼈手記云收拾殘本輯爲六卷其族孫森書又得南厓親書詩藁二卷皆亂時棲遁之作蒼涼悲感雅近少陵

村居

頓作無家客偏爲間道行艱難脫賊手辛苦出危城破甑
悲身世虛舟任死生淒涼窮鳥賦弓影莫頻驚

生事風前葉人情屋上烏蒼生猶有劫羣盜尙稽誅鼓枹
逢漁父纓冠笑腐儒宵來望天末雲氣正模糊

經句無客至綠徧上階苔石壓筍斜出雨淹花卧開避喧
聊把卷惡醉罷銜杯卻怪牆東叟談詩久不來

每歎雨無極欣聞歲有秋直因窮得健始信老無憂一舉
輸鴻鵠羣呼任馬牛君看三尺劍繞指亦成柔

初冬避居東鄉感賦

三月孤懸斗大城四鄰俱陷絕援兵重關尙設顛當守一
穴潛通螭螭營君子空悲化猿鶴天公未肯戮鯢鯨腐儒

縱復從寬政七十頭顱悔倖生

巡植登陴愧壯夫斗間妖孽認模糊遺民已聽千家哭賊
火還愁萬室枯大將空傳擁鵝鵲團兵猶慮聚萑苻七朝
涵養稱全勝此日彫殘那易蘇

桃源何處獨悵悵咫尺烽煙隔故鄉惡夢每疑逢黑劫微
官也似熟黃粱飢寒我愧陳無已憂樂誰知杜季良身世
那堪追子美詠詩獨立太蒼茫

太息威弧久不振坐令羣盜滿城闌一身漂泊風中絮幾
輩流亡劫後塵漫說軍儲敲骨髓誰知籌筆敝精神么魔
命盡終蒞醢會見熙陽麗紫宸

仲冬五日玉年珠川二兒來寓作詩示孫春元用東

坡清虛堂詩韻

歲寒堽戶無風沙如僧退院吏退衙餘年健在眞碩果世
事閱盡如空花崢嶸歲月蛇掣尾漂泊身世狗喪家一捫
得飽羨飢驚三匝未穩輸驚鴉子舍來愁室懸磬孫謀近
喜經傳葩賸僚那得太倉粟殘客敢望頭網茶分隨博士
寫驢券敢逐健兒挽馬撾但支傲骨動齟齬豈有奇字攻
菟爬見聞時復助嘖喈疏水幸能辦咄嗟只愁衰鬢等枯
雪安望醉臉如流霞

孟傳璿字在星章邱人諸生官壽光訓導有贈雲山館
遺詩

閒步

古岸通新屐西風倚望間白雲黃葉寺秋色夕陽山野菊
如人瘦沙鷗共我閒朗吟獨歸去流水掩柴關

金鼎燮字承高號小岱秀水人署臨安訓導兼教諭殉
難贈國子監學錄

上元後十日竹坪叔招集豫順堂出觀姜西溟書上
元讌集詩卷卽次其韻敬和

東風吹十日萬戶春酣酣晴紅融雪岫暝綠蒸煙潭辛盤
味乍飽花勝頭猶簪玉壺好春色不醉心奚甘折柬招近
局開筵資深談論文到千古日落還停驂惜哉玉梅骨枯
枝撐書龕思與重寫照丹青非我諳一尊醅疏影詩盟差
可煖對酒本當歌各抒性所耽況諸坐中客博物誇世南
文辭復書翰五絕兼其三昔者昌谷家愈湜偕來探心胸
羅列宿賦筆天工慚喜招高軒過酒滴真珠饌詩成再拜
進雙髻垂鬢參差余近弱冠隅坐心如惓詞華有根柢經

術非撻搏幸蒙大匠手雕鏤蛤與蚶終慮徑寸質席珍其
何堪春華冀努力汲古勤開函直須識三篋莫便攜雙柑
不見培風翼不見食葉蠶持此壽臣叔食報青雲貪門前
新柳色染衣都成藍何當祀九烈同醉酒一甌

金鴻佺字希倬號蓮生秀水人候選訓導

莎哥行

莎哥沈姓名世麒麟秀水人少無賴嗜博成
豐十年賊自丹陽東下應募守平望戰死

生不願作多田翁酒徒無賴皆英雄又不願讀萬卷書彎
弓擊劍輕頭顱莎哥一擲百萬賭笑殺人間守錢虜睚眦
必報恣橫行孝侯爲害能射虎鼓鼙動地飛檄幢破竹干
里何人攻子龍一身都是膽隻手奮起攫其鋒男兒南八
分死耳功雖不成心則同模糊碧血灑古渡髑髏提出無
人顧英靈應儼五人墓

張延邴初名丙字漁村一字娛存合肥人貢生候選訓導有延青堂詩集

偕諸季展先墓因宿山家

小住山家亦有情
殷勤雞黍間藜羹
白雲虛我十年約
青嶂邀人一日程
脫葉塵風驚夜雨
破窗透月穩秋晴
老來諸季聯牀少
爲感松楸話五更

雨後雜興

溪面游魚唼柳花
溪頭竹屋住漁家
夜來新漲添三尺
短盡前灘蘆荻芽

巾箱花片隔年收
雨甲煙苗種不侔
更與童孫教時法
預編黃竹引牽牛

車酉字雙嵐溫江人河南候補州判有五柘山房詩集

晚過健爲道中

野寺聞鐘磬歸人晚渡忙孤山升半月一鳥下斜陽寂寞
家鄉杳清涼客路長漁燈巖畔點閒殺卧輕航

謝綸字蓮士江陰人官隆安縣丞有蓮潔詩集

山海關道中

驅馬走邊州蒼茫萬里秋高山橫塞出巨海抱天流風捲
黃沙怒霜飛白日愁遼歌聽未斷角吹起關樓

浦丈情田垂示憶昔長句次韻以廣其意

巖客曾傳幾卷詩仙人遺跡無須疑我亦飄然攜一劍足
踏浮雲任所之忽見青山重疊起仙鄉尋得方忻喜山鳥
山花多有情影落山溪蕩春水又被天風吹我游浮空萬
里同虛舟爲愛華胥雲五色撥雲落向紅塵留行歌偶得

走盤珠音響何如于薦于賢人之言亦圓美離離光彩生
金樞獨羨先生求絕境心隨月上中峯頂闊宕胸懷似太
湖汪洋三萬六千頃上下茫茫數千載若箇騷人爲主宰
氣湧黃河天際來飛送雲帆過滄海有時剖玉登崑岡餐
霞吸露分陰陽團結精神蘊奇妙中情外貌俱堂堂手集
芙蓉裳棄軒蓋置埃脫盡神冲泰江表閒居歲月多常從南
郭論天籟現出神通非一臂奪取天工真不易刻鏤陶埏
得自然卷舒離合憑元氣變化圖南今古少并月光微甕
天小讀公議論見根源豈必無言能悟道當前一柱擎南
天日與萬象爭鮮妍不向丹鑪看九轉逍遙還作詩中仙

王鵠原名鴻字子梅天津籍長洲人官聊城縣丞有喝

月樓詩錄天全詩錄

詩話子梅詩才氣橫溢隸事精核惟貪多填砌時失
之冗自言學詩先學杜後學蘇真面目我先飲杜易肝
腸蓋自道得力如此子梅常爲瑞卿客一夜庭月如
水子梅上坐一客倚簫次之王自奉席居下呼宮人
進一卮酒爲先生壽卽授筆札請爲詩簫甫按松高
鶴驚雪羽孤起天際有聲與之俱杳詩成王曰先生
不負吾酒也更卮進飲大醉席地宮人掖之出後常
爲其友何家琪言之

海市

海氣結海市出驀地浮雲耀金碧初見雲霞互明滅陡然
一起畫圖列市中樓閣何玲瓏排空雉堞氣鬱蔥素珠泣
鮫客赤仄拋海童珍寶紛呈莫名妙惜無書卷高棟充但
見如山奇貝羅龜龍龍子龍女爭青紅市東寶馬多雄駿
健兒飛鞋何騰躡龍伯耀武跨隱麟市南龍闕高嵯峨依
稀袍笏揖讓多蛟魚鞠躬聽玉珂市西市北紅樓影鯢婆

水母華妝靚珊珊游戲凌波冷鴛鴦沈水比目浮簾動春
風夢未醒奇絕蒼茫市之尾翠堵波倏矗天起僧伽影冷
水雲裏繁華世界驕龍公浮雲變幻驚雨工忽然海天一
碧清雙瞳萬象寂滅隨飄風

雪夜不寐懷陸大憩園汪七芸崖袁六復生

萬山風雪一鐙死老屋打頭風破紙傲寒不卧獨起舞高
歌者誰子梅子蒼茫浮白渺天涯萬斛離愁忽湧起江南
親舊半存亡夢斷蘊香路阻長七載雲飛憐客瘦千竿竹
冷歎莊荒無端今雨亦離別輪鐵勞勞役南北碧翁何事
忌團圓不使朋山聚一室汪倫風雅最多情好吟時作蒼
蠅聲更歎袁絲太瘦生詞調玉管韻淒清才人共爲衙官
誤如此奇寒遠行路孤負梅花第一枝輸他桑苧翁歸渡

歲寒心遠書俱絕安得與春歸頃刻各有相思各不知他時記取鴻泥雪

暮抵高唐

勞勞去馬復來牛蒼莽同深今古愁動地雙輪追落日礙雲一塔表雄州護城角起驚歸鳥吹月風高冷徹裘來弔縣駒舊居處夢中空聽碧波流

晤家月巖兼寄顧蕤勺

人日憶故人題詩寄何處五夜淒清寒翦燭三年離別風飄絮談詩不倦虎頭癡飛夢難尋虎山路春風一夕心顏開舊雨不來新雨來故人無恙新詩裁笑談連襪同徘徊九載相思故園竹三徑綠寒荒老屋前年水患憂貴粟鴻雁嗷嗷髀體哭感舊可憐新鬼多思歸并少畸田薄詩亡

影瘦一書生母病兒殤夢也驚科名草少英雄死志氣人
高鬼蜮瞋何日壯懷伸歸卧靈巖頂煙雲供畫猿鶴捧茗
狂歌長嘯花香雪冷紅塵變幻渺不知日與故人醉賦詩
團圓月照眞鬚眉并無相逢何別離百年歌舞長於斯何
至海右亭前始相見同有思鄉愁一片君家癡叔髮蒼蒼
何事衝寒跋涉忙相逢且盡今朝樂笑對春風醉百觴

登岱至月觀觀月出

卅年登岱勞夢想今朝意外乘雲上醉排闥闔紫微壺豪
躡煙霞綠玉杖天門一綫賈勇登鳥道盤空千萬層松濤
絕壑驚天雨雪瀑飛龍太古冰神霄竦峙壺天閣萬仙遙
奏鈞天樂眼底齊州九點煙樽前海屋千年鶴四禪風靜
斷聲聞莫作人間絕頂人紅塵已隔碧霞冷狂招太乙侍

元君雲馬風車游汗漫日觀不登登月觀捫參歷井摘斗
牛足下湯湯走河漢神鐙紅炫蓮山青九蟾飛光破太清
銀海半規初湧魄玉隆萬象涵空明乾坤一氣澄清景物
我兩忘太素境洗眼何須王母池回頭已失仙人影不與
吳郎借斧柯不從梁甫發高歌瓊樓玉宇渺如許霖雨蒼
生可若何耐得高寒眺八極眞形誰見探靈笈笑邀無忌
認前身且向蓬元卜虛室

游西山

勞生何日出塵鞿同上西山攬翠微九曲亭前斜照落萬
松嶺外一僧歸江聲浩浩鶴東去柵葉蕭蕭風亂飛名士
英雄俱已矣祇餘禪榻靜相依

重游四松庵感懷用壁上默溪上人韻寄前游諸君

八年同叩四松扉詩龍酒虎醉夕暉江山無恙客重到風
雪滿天鶴獨飛南國佳人夢同夢西征將士歸未歸水雲
深處靜俯仰孤負舊時垂釣磯

歸泛明湖宿匯泉寺感寄故人

鬱鬱羈懷渺渺春春歸欲挽重傷神江湖滿地愁孤客花
雨高寒夢故人慷慨論交逾骨肉艱難時事況風塵憂傷
莫道儒冠誤浩蕩乾坤未死身

題東平詩藁

聖主憐才特賜環孤臣草莽入嚴關一腔熱血蓬婆雪萬
里高歌苜蓿山草檄如風驚海外罪言此日重人間平戎
依舊先生策雖未封侯足解顏

吳爲楫原名爾梅字和甫號嘯雲仁和人諸生官大竹

縣丞有大能寒軒詩鈔

詩話嘯雲爲子修提學叔祖以雅才困下吏子修言其少入蜀晚年就養關中後復僑蜀課孫自娛嘗輯宋人小說類編蒐采甚博

漳河銅鵲鑪歌

乾隆初漳河土人掘地得銅鵲鑪腹篆孟德二字又隸書銅雀東閣四字

陸敏齋時過漳河購而藏之繪圖徵詠爲作此詩

君不見銅雀臺漳河水上高崔嵬臺傾銅雀亦飛去繞樹
烏鵲聲何哀又不見銅鵲鑪漳河水底埋泥汙河清銅鵲
忽飛出含風迷迭芳紛敷瑣瑣升沈何足感憑弔興亡一
俯仰橫槩詩悲鐵已銷臨江酒冷波猶蕩停車河畔草青
青漁梁打網鴛鴦驚孤鷺齊飛霞外見夫渠摹寫水中明
其兄承魏王小印鵲鑪腹浪戰沙磨斑未駁玉鳬幾輩入
西陵銅雀何年起東閣繡褥橫陳六尺牀睡依冰井夜生

涼雙掩翠衿銜篤耨偶拖紅袖惹都梁對酒當歌臆脰短
銅盤露冷華林苑一朝鑪柄付他人金鳳銀鵝各分散賸
有龍涎換夕熏鄴宮餘燼此中存傷心戲鳴人何處回首
分香火不溫瓦硯隆隆磨未了薰籠扶出金衣烏姦雄遺
臭物自芳器惟求舊鑪堪寶搜羅彝鼎共鋪陳愛古鍾情
邁等倫多少銅駝埋沒盡洛陽門外更何人

次韻碩農飛來鐘

原詩序云建昌郡白塔寺唐時建

五寸口僅五寸餘厚五分重約三十餘斤身有三
十六乳盤鈕花紋左有篆文曰林鍾中聲右曰內
奉字磨蝕欲平無年無代老
僧云相傳自西藏飛來者

飛來鐘問胡不在名山勝境之靈峯雲雷古篆內奉字知
非野寺荒寮供何年棄擲西徼外番饒胡益羞錚鏘鴻材
非可寸莛擊節奏自發如風松已甘埋沒香積底編懸誰

辨笙與鑪有唐古寺建白塔幡蓋大啟金仙容非無鐘魚
皆細響不脛而走來駟邛霜宇風清下元鶴天池夜靜驚
潛龍獅王呵護歷年久不與劍戟同銷鋒三十六乳環帶
滿但有睚澤苔痕封林鍾中聲中六呂高下我欲咨瞽宗
賢侯博物冠今古崇論宏議時橫縱蒲牢爭向筆底吼鯨
呿墨沼奔濤洶搜羅金石到法物非若檐鐵聲丁冬深山
作宰十餘載每聞晨杵心惺忪鐘鳴鼎食滿曹署浮金碧
玉多庸庸爭如此鐘能不朽韻繞樂銑清而丰君侯本是
清廟器要與鳬臬追垂蹤循良報最書上考如彼振鷺翔
西雝景陽鏗曉紫衣引五色雲氣懸閒從崇牙樹羽東序
上嚕吟鞀鞞隨所椿和聲鳴盛在今日知音師曠非難逢
君不見飛來鐘

大樹堡晤王若愚參軍

越雋資屏障周戎疆索分河聲瘖萬馬嶺勢勒千軍大樹
威猶震夷巢淨不氛姬隅問何物蠻語紀初聞

沈鉉字成齋歸安人諸生官弋陽巡檢有隨吟小草

憩白雲居贈霞裳道士

偶尋黃葉路正值白雲秋到此塵緣淨悠然清興留餘糧
分鶴飼落果遣猿收羨爾煙霞侶逍遙物外游

顧植字直木號建叔金匱人官城武典史有孟晉齋詩

鈔

詩話直木與其兄子幹同邃於學爲文下筆千言才
華瞻麗以未儻浮沈山左十五年拾匪至官吏皆倉
皇出走直木獨率城民固守旬餘援軍至夾擊之賊
乃遁去口不言功崇語鈴中丞頗知其才以限於資
格終不獲遷一階其在官終日閉門擁鉛槧如經生
所著孟晉齋詩篇帙甚富遭亂勵存此數十篇顧森

書謂考其年自道光癸未迄辛丑爲十二
齡至三十之作清詞麗句自是才人之筆

雜詩

高樓峙西北縹緲浮雲端中有愁思婦撫琴獨長歎容顏
耀朝日咳吐如芳蘭動作禮自持秉質幽且閒陽春久不
作感懷時一彈莫謂和者寡知音良獨難舉世盡擾擾何
處結古歡

良會不可久臨別獨遠將誰知一失所道路阻且長秋風
搖落辰啟戶心徬徨欲行陸無車欲渡河無梁安得共攜
手長歌累十觴願爲雲中鴻奮翅起高翔

日夕登高樓矯首矚寰宇寒暑遞推遷中處皆逆旅獨雁
無長鳴秋林多宿雨攬衣起徘徊無言倚南戶青陽不長
在春華已塵土何以寫我憂橫琴不成撫

春寒曲

雕窗深鎖天桃病。鸚兒潛喚花朝近。簾箔湘波翠地垂。閒門未啟春寒嫩。欲晴不晴雲意悶。煙霏引素涼生暈。刻意傷春春豈知。金屏愁擁鑪香燼。恩恩百五韶光老。惆悵心情向誰道。紅闌半落斷腸花。綠階未長忘憂草。林霧微濛。靄晝陰谷鶯睨。悲情曉夢醒重衾。怯峭寒開門且把閒花掃。

偕諸同人登君山絕頂望江放歌

大江南來幾千里。羣山如龍躍江水。君山陡起扼其衝。水自奔流山自峙。我來正值新柳絲。連宵陰雨初霽時。遙峯破睡向我笑。似欲索取登臨詩。爰偕俊侶梁園客。共弔青山興廢跡。浮遠堂前夕照紅。瞰江亭外春波碧。振衣直上

覽大荒決皆鶴鶴乘風翔茫茫萬頃渺無際其勢直欲吞
穹蒼披襟脫帽忽長嘯下視嵇康把頭掉足休遺白壁
羞拙身會向青溪釣鬱鬱胸懷何日開當筵幸有酒盈杯
君不見賢愚終古俱塵埃春申至今安在哉

閒情

十二雕欄倚碧城好拈綵管理芳情枇杷門巷銀鐙影楊
柳亭臺玉笛聲昨夜星辰何黯淡當年雲雨不分明茂陵
久抱相如渴香茗盈甌爲解醒

僕射餘情懺悔多華年流水去蹉跎畫簾燭暗瀟瀟雨綺
陌人歸緩緩歌桂葉自能香玉露藕花何幸傍銀河不堪
舊事成追憶明鏡重煩照淚波

泰山次李竹醉廉訪

振翥韻

岩堯泰岱削雲根俯視羣山氣象尊上界星辰低日觀中
峯雷雨挂天門乾坤頓覺三千隘雲夢應將八九吞幸侍
後車陪勝覽扶桑俄頃上朝暾

晚晴移詩匯卷一百三十四終